

弘

簡

錄

弘簡錄卷八十六

明刑部員外郎仁和邵經邦弘齋學

皇清翰林院侍講學士四世孫遠平校閱

天王 宋一之一

太祖皇帝姓趙氏諱匡胤涿郡人高祖胤仕唐歷永清文安幽都令曾祖珽瀋州從事累官御史中丞祖敬歷營州三州刺史贈左驍衛上將軍父弘殷是爲宣祖少驍勇善騎射事趙王鎔爲將將五百騎援唐莊宗于河上有功莊宗愛其勇留典禁軍漢乾祐中討鳳翔王景戰于陳倉蜀兵來援矢集左目氣彌盛奮擊大敗之以功遷護聖都指揮使周廣順末改鐵騎第一軍復轉右廂皆都指揮俄領岳州防禦使從征淮南前軍却吳人來乘邀擊敗之顯德三年督軍平揚州與世宗會壽春累官

檢校司徒爵天水縣男卒贈太尉武清軍節度使母杜氏後唐  
天成二年二月十六生太祖於洛陽夾馬營體有金色三日不  
變幼從辛文悅肄業嘗夢迎駕及見乃是匪亂其異之長學騎  
射輒出人上嘗試惡馬不施銜勒馬逸觸相而墜人憂其首必  
碎太祖徐起追馬膂上一無所傷與韓令坤博士室中因雀鬪  
競起掩捕室隨壞因得無患漢初漫遊無所遇舍襄陽浮圖有  
老僧顧令北往果遇周祖征李守貞遂應其募得居帳下廣順  
初補東西班行首拜滑州副指揮世宗尹京轉開封馬直軍使  
卽位復典禁兵從戰高平樊愛能遁軍以危太祖亟馳馬磨衆  
衝其鋒漢兵大潰左臂中流矢不顧乘勝攻河東城焚其門還  
拜殿前都虞候領嚴州刺史父子分典禁兵從征淮南首敗萬  
衆于渦口斬兵馬使何延錫等南唐兵十五萬塞清流關擊走

之追至城下節度使皇甫暉願成列以決勝負笑而許之暉整  
陣出太祖擁馬項直入手刃暉中腦并姚鳳擒之夜半宣祖率  
兵至傳呼開門太祖曰啓閉王事也詰旦乃得入令坤已下揚  
州遇援兵大至將議棄城世宗命率兵二千往救至六合下令  
曰揚兵敢有過此斷其足令坤懼始固守尋敗齊王景達于六  
合東斬首萬級還拜殿前都指揮領定國軍節度使從征壽春  
拔連珠砦遂下壽州徙節義成軍加檢校太保從征濠泗爲前  
鋒敵砦于十八里灘世宗方議以橐駝濟師太祖忽躍馬截流  
先渡麾騎隨之遂破其砦因其戰艦乘勝攻下泗州南唐屯清  
口從世宗翼淮東下遂拔楚州進破鑾江口直抵南岸焚其營  
柵又破之于瓜步淮南平唐主畏祖威名用間使遺書餽白金  
三千兩太祖悉輸之內府間乃不行改節忠武軍世宗北征爲

水陸都部署至瓦橋關守將姚內斌引數千騎來拒戰敗降之  
關南平世宗在道偶閱四方文書忽得韋襄中題云點檢作天  
子心大異之時張永德爲點檢世宗不豫還京命太祖代之加  
檢校太傅恭帝卽位改節歸德軍檢校太尉鎮定二州告河東  
劉鈞結遼兵入寇朝議遣太祖率兵禦之以元年正月辛丑朔  
出師副點檢慕容延釗將前軍先發都下謹言則點檢爲天子  
惟內廷不知癸丑大將繼出次陳橋驛戊夜軍士集驛門宣言  
願推戴衆不可遏遲明直逼寢所太祖方起諸校已露刃列于  
庭誼曰諸軍無主願太尉爲天子尚未及對輒以黃衣加太祖  
身羅拜於前呼萬歲卽披上馬太祖攬轡誓諸將曰我有號令  
爾能從我乎皆曰唯命太祖曰太后主上吾北面事之不得驚  
犯大臣皆我比肩不得侵凌朝廷府庫士庶之家不得侵掠用

令有重賞違卽孥戮汝諸將皆再拜聽命肅隊以入秋毫無犯  
先遣客省使潘美見執政諭意旣至進登明德門令甲士肅營  
退就都點檢公署有頃諸將擁宰相范質等至太祖見之流涕  
嗚咽不勝曰吾受世宗厚恩爲六軍所逼一旦至此慚負天地  
將若之何質等無所對相顧降階列拜名文武百僚至哺時班  
定宣徽使引就廷宣讀周恭帝禪位制書北面拜受已宰相掖  
升崇元殿山東序服袞冕登座卽皇帝位羣臣朝賀畢遷帝及  
符后于西宮降號鄭王後居房州尊符后爲周太后

建隆元年春正月乙巳遣官告天地社稷大赦改元定有天下  
之號曰宋加恩徧及諸僭國諸鎮將帥以書告南唐吳越等受  
禪之意贈死節韓通中書令命以禮收葬加石守信王審琦高  
懷德張令鐸張光翰趙彥徽各領節度使餘並進爵范質王溥

魏仁浦並同中書門下平章事樞密使吳廷祚同中書門下三品各賜襲衣犀玉帶鞍馬有差進趙普官乙卯遣使分賑諸州是春均坊商洛鼠食苗宿州火遣使恤災丁巳作周六廟于西京遣官歲時享祭命周宗正郭玘守奉陵廟癸亥加恩諸節鎮符彥卿王景李穀殷高保融等咸進封爵甲子賜皇弟匡義名光義已巳從張昭議依隋唐以來立四親廟而諡高祖文獻皇帝廟號僖祖妣崔氏文懿皇后曾祖惠元皇帝廟號順祖妣桑氏惠明皇后祖簡恭皇帝廟號翼祖妣劉氏簡穆皇后皇考武昭皇帝廟號宣祖遂視學增葺祠宇塑繪先聖先賢像自爲贊書于座端令羣臣分撰餘贊命崔頌教國子令武臣讀書知爲治之道於是臣庶始貴文學中原有主契丹與北漢軍皆還二月乙亥尊母南陽郡夫人杜氏爲皇太后丙戌從宰相請立生

日爲長春節賜羣臣衣各一襲三月賜進士楊礪等十九人及第出身改天下郡縣之犯御名廟諱者丙辰南唐李景昇越錢俶遣使來賀卽位壬戌定國運以火德王色尚赤臘用戊蜡祀廟社皆用臘日命寶儼改定周樂文爲文德之舞武爲武功之舞十二願爲十二安上其樂章夏四月癸巳親征澤潞平李筠五月己亥朔日食六月癸酉有星赤色出心又出太微垣歷上相大赦減死罪免澤潞今年租丁夫給復三年錄陣沒子孫秋七月幸大梁改爲東京開封府洛陽爲西京河南府戊申還宮以趙普爲樞密副使詔殿前侍衛二司各閱所掌兵揀其驍勇升爲上軍諸侯長吏各選部內兵送都下以補禁旅之闕定強壯卒爲兵樣分送諸道召募教習大懲藩鎮之弊更立戊法分遣禁旅戍守邊城使往來道路以習辛苦均勞逸自是將不得



專其兵士卒不至於驕惰皆普謀也八月戊辰朔御崇元殿行  
入閣儀壬午以光義領泰寧軍節度使甲申立琅琊郡夫人王  
氏爲皇后己未親征揚州平李重進冬十月命賑揚城民米人  
一斛十歲以下半之賜脅謀爲軍者衣履遣還攻城役夫死者  
人給絹三匹復三年十二月丁亥還宮以寶儀爲翰林學士辛  
卯留從效稱藩是歲三佛齊占城諸國遣使貢方物以後不錄二  
年春正月丙申朔稱慶太后壬子命度民田河南令李瑋坐賊  
杖死左贊善大夫申文緯坐失察除籍上語宰臣比命使度田  
多邀功敝民當慎其選上惡昔日藩鎮率遣親吏視民租入公  
取羨餘二月遣使監輸民租詔有司考古式作爲嘉量以頒天  
下新制既定宿弊盡革中外大以爲便癸酉賜進士張去華等  
十有一人夏四月癸巳朔日食壬寅詔郡國置戶守前代帝王

賢臣陵冢已酉無棣男子趙遇詐稱皇弟伏誅五月乙丑天狗  
星墜西南六月甲午皇太后崩己亥從羣臣請聽政於別殿自  
此至乾德元年不御正衙受朝賀權倖時享辛丑見百官於紫  
宸門庚申釋服八月壬寅上以諸郡長吏率多武人防禦仇起  
故入州民馬從玘罪流之海島自是親決庶獄多所矜恕苟情  
涉妬害必加重辟因語宰相人命至重五代以來諸侯跋扈枉  
法殺人朝廷置而不問自今諸大辟所屬軍州決判訖錄案奏  
聞委刑部覆訊著爲令辛亥女直遣使率表稱賀仍貢馬金國  
庚午命脩周世宗實錄十一月甲子皇太后祔廟癸酉沙州節  
度使曹元忠瓜州團練使曹延繼等遣使獻玉鞍勒馬十二月  
壬申回鶻可汗景瑖遣使來獻方物以復庚戌畋于近郊帝頗  
好遊畋無歲不出因逐兔馬蹶墜地刺殺其馬旣而悔曰吾爲

萬乘主輕事遊獵馬有何罪哉遂不出畋是歲幸造船務觀習  
水戰幸玉津園相國寺以後不錄三年春正月己巳賑淮南饑詔

郡國長吏勸民播種甲戌廣皇城癸未及二月丙辰連幸國子  
監庚寅詔文班舉堪爲賓佐令錄者各一人不當者比事連坐  
上擢用臣下多出宸斷內外臣僚不以官職高下有公清才幹  
文武政事爲時所推者別置簿書錄其姓名每遇華要任使卽  
於簿中選擇甲午賜進士馬適等一十五人詔曰朕應選開基  
推誠待物渴聽讜言庶臻治道自今百官朝對內殿起居僉須  
直陳時政利病百姓疾苦刑獄冤濫悉採訪以聞無以觸諱爲  
懼先已定竊盜律已亥命更定三月戊午朔朕次賓霜殺桑丁  
卯幸太清觀禱雨己巳大雨夏四月延州寧州大雪溝洫冰趙  
衛二州旱甲申詔均戶役禁奉使請託縣令考課以戶口增減

爲黜陟敢蔽占者有罪乙酉廣大內及示城命有司按洛陽宮殿圖脩之自春不雨減膳撤樂命使檢諸州旱賊京畿河北死罪以下壬寅京師雨上聰明睿智知人任使下僚中有一行可觀一才可取者皆蒙擢用時王明爲鄆陵令廉潔愛民一邑大治以知廣州擢華州司戶李頌贊善大夫延州錄事郭思齊太子中允河陽判官石雄左補闕萊蕪令劉堪左拾遺一時州縣皆稱得人八月乙未詔吏部舉書判拔萃科次年覆試中田可封宋白譚利用等壬申脩武成王廟冬十月乙酉朔賜百官冬服推廣故事自將相學士諸軍大校以下咸及之恩始于此吳延祚罷以趙普爲樞密使變革制度罷石守信等典兵各就鎮自今節度不領支郡皆直屬京師藩臣有提兵邊防位兼將相者每被召則奔走而至其術皆自普爲之十一月丙子高麗遣

李興祐等來朝以後十二月丙戌詔縣置尉一員理盜訟置弓手視縣戶爲差班捕盜令戊戌蒲晉慈隰相衛宿州皆饑命振之

乾德元年春正月定制以文臣知州縣係以京官職銜權理外事凡物故遷謫致仕皆不得自專諸州各置通判一員大府二員令統軍兵諸政事皆得專達與長吏均禮並以京朝官充之三月壬辰荆南高繼冲請歸朝籍管內錢帛芻粟之數來上得州三縣十七戶一十四萬二千二百乙未遣克潭州慕容延釗等獲周保權以歸湖南平得州十四監一縣六十六口九萬七千三百八十八減二方管內死罪一等鹵掠者給主及賞立功將士并沒王事斬彥朗男永勳等三十人補殿直乙酉遣祭南岳丁亥幸國子監并武成王廟罷白起從祀夏四月賜進士蘇

德祥等八人詔禮部取年貌合格誦書精熟者充覆試不如者  
主司連坐定補蔭法自今臺省六品諸司五品登朝第二任方  
得補蔭五品少府不在此限辛卯頒建隆應天曆及刑統于天  
下時多事之後義倉廢寢詔復置令於二稅外別稅一斗貯之  
以備振貸五月丙申詔歷代帝王三年一饗立漢光武唐太宗  
廟十一月甲子有事於南郊大赦改元宰相率百官奉玉冊上  
尊號曰應天廣運仁聖文武至德皇帝南唐吳越遣使進郊祀  
禮物并賀尊號賜近臣襲衣金帶器幣鞍馬有差增光義光美  
食邑加普光祿大夫賜功臣號文武臣僚各進階勳爵邑十二  
月甲申皇后王氏崩二年春正月甲申著四時聽選式詔近  
臣各於見任幕職京官中舉堪任郡守副佐各一人謬舉者命  
連坐丙戌賜進士李景陽等八人戊子宰相質溥仁浦懇求避

位從之庚寅代以趙普壬辰始置制舉三科賢良方正能言極  
諫經術優深可爲師法詳閑吏理達於教化凡應不限官庶內  
外職與布衣草澤皆得充親試以策凡三千字爲限以博州判  
官顏贊中選甲辰詔諸道獄詞令大理刑部檢詳或淹留差失  
致中書門下改正者重其罪夏四月大旱詔諸州長吏視民田  
蠲租不必俟報乙丑始置參知政事以薛居正呂餘慶爲之十  
一月甲戌命伐西蜀乙亥宴王全斌曹彬等于崇德殿示以川  
峽地圖面授攻取方略賜金玉帶衣物有差 三年春正月癸  
酉朔有事西蜀不御殿受朝甲戌王全斌等克劒門進次魏城  
乙酉蜀主孟昶降得州四十五縣一百九十八戶五十三萬四  
千三十有九乙未詔撫將吏百姓赦其俘獲除管內逋賦免夏  
稅及沿徵物色之半庚申全斌殺蜀降兵二萬七千人於成都

是月賜進士劉察等七人兩川盜起先鋒都指揮高彥暉死之  
詔所在攻討五月丙戌見孟昶於崇元殿遂宴於大明殿丁亥  
賜將士衣服錢帛戊子大赦減死罪一等授昶中書令封秦國  
公子弟諸臣賜爵有差是歲從趙普議始置諸路轉運使自度  
支經費外凡金帛悉送京師無得占留所在場務皆令掌管凡  
節度防禦團練觀察諸使及刺史皆不得預於是財利盡歸于  
上矣辛酉壽星見九月己巳閱諸道兵以騎軍爲號雄步軍爲  
雄武金隸親軍命王繼勳將之四年春正月以孔子四十四  
代孫宜爲曲阜主簿奉祀孔廟自五代以來襲封廢絕至是始  
復是月賜進士李肅等八人夏五月親策賢良方正姜誨等聞  
月詔求遺書八月宴宰相趙普樞密李崇矩開封尹光義等於  
紫雲樓論及民間事因語之曰下愚之民不分菽麥如藩臣不



爲撫養務行苛虐朕斷不容之普等對曰陛下愛民如此乃克  
舜之恩也十一月初用雅樂命太常和峴討論別造十二律管  
以取聲音始和暢 五年春正月詔諸道州府各舉通跡丘園  
躬行孝友爲鄉里所重者一人資遣赴闕成都府奏孝子一人  
爲親守墳三年有芝草甘露之異擢爲延州主簿密州奏齊得  
一能講五經教授於鄉學者遠至擢爲章丘縣簿甲寅降王全  
斌等官丁巳賞伐蜀功朝議將以王繼恩爲樞密使上不欲使  
居權要之職乃立昭宣景福殿使以寵異之三月五星隕鎮星  
聚于奎奎魯地分在戌降婁之次主文章占曰天下文明之象  
六月戊午朔日食賜進士劉蒙叟等十一人秋七月詔曰夏秋  
以來水旱作沴朕念民庶恐致流離其令州府長吏預告人戶  
有災傷處並放今年租賦

開寶元年春正月甲午增治京城賑陝之集津絳之垣曲懷之  
武陟饑者二月立皇后宋氏三月覆試貢舉賜進士柴成務等  
十一人詔曰造士之選匪樹私恩世祿之家宜敦素業近聞黨  
與頗竊吹噓文衡公器豈宜私濫自今凡關食祿之家悉令中  
書覆試上降墨敕憫河北民苦貴鹽聽民間買販惟收稅錢不  
許官椎立養兵法欲禁軍習山川勞苦戒衣長不許過膝兼以  
外戍日多在營口少務遠妻孥懷土之情夏六月丁丑太白晝  
見戊寅復見辛巳龍出單父民家井中大風雨漂民舍四百區  
死者數十人十一月癸卯南郊大赦改元惟官吏受賊者不原  
宰相普等奉冊寶上尊號曰應天廣運大聖神武明道至德仁  
孝皇帝乃享太廟十二月甲子行慶自開封興元尹宰相樞密  
使及諸道蕃侯並如勳爵有差乙丑大食國遣使獻方物二

年春正月己卯朔有事北漢不御殿受賀二月乙卯自將往擊  
宴諸將李繼勲等于長春殿甲子發京師戊戌駕傳城築連城  
圍之復引汾晉水灌其城四面皆築長隄李繼勲軍於南趙贊  
軍於西曹彬軍於北黨進軍於東城中大懼然猶恃遼爲援夏  
四月乙未何繼筠敗契丹於陽曲韓仲贊又敗之于定州北命  
陳示所獲首級鎧甲于城下城中益喪氣自戊子至庚寅水軍  
載弩環攻橫州團練使王廷義殿前都虞候石漢卿死之甲午  
憲州史昭文嵐州趙文度皆來降甲辰都虞候趙廷翰率諸班  
衛士叩頭願以死攻請先登上不許曰汝輩皆我所訓練以備  
肘腋同休戚我寧不得太原不忍驅汝曹蹈必死之地不許衆  
皆感泣壬子太常博士李光贊言曰蕞爾晉陽豈須親討重勞  
飛輓取怨黔黎莫若回鑾復都屯兵上黨使夏秋有獲旣寬征

藝必致蕩平上從之命趙普諭諸將解國而還五月入京命諸  
州獄吏恤繫囚五日一檢視灑掃獄戶洗滌杻械給貧者食病  
者藥小罪卽時決遣歲以爲常賜進士安德裕等七人割景福  
內庫爲珍寇備用冬十月鳳翔節度使王彥超及諸藩鎮皆來  
朝自陳請老及武行德郭從義白重贊楊廷璋皆罷之三年  
春正月辛酉詔民五千戶舉孝弟彰聞德行純茂者一人奇才  
異行不拘此限曹州舉德行孔蟾擢爲章丘主簿孝子羅居適  
爲延州主簿三月庚戌詔閭貢士十五舉以上司馬浦等百六  
人並賜出身辛亥賜進士張珙等八人夏四月辛未朔日食秋  
七月詔以吏員猥多難以求治俸祿鮮薄未可責廉自今州縣  
宜以戶口爲率差減其員舊俸外月增給五十九月巳亥朔伐  
南蠻遣使發十州兵會賀州甲辰詔所在有司周文武成康秦

始皇漢高文景武元成哀後魏孝文西魏文帝後周太祖唐高祖太宗中肅代德順文武宣懿僖昭諸帝凡三十七陵嘗被盜發者備法服常服各一襲具棺槨重葬長吏致祭增守陵戶各二 四年春正月戊戌朔有事南漢不御殿癸丑潘美等兵薄廣州已丑克之俘劉鋹廣南平得州六十縣二百四十戶十七萬二百六十三辛卯大赦從梁周翰請免廣南二稅及僞署官仍舊並放男女爲奴婢轉傭利者悉除僞政無名配斂商稅鹽麴如荆湖法及減租耗米五月乙未朔大宴功臣於大明殿銀預焉丁酉賞伐廣南功六月癸酉遣使祀南海丁丑命翰林試南漢官取書判稍優者授令錄簿尉賜進士劉寅等十人秋七月辛卯景星見冬十月癸亥朔日食乙未南郊賜執事官器幣有差十二月丁卯行慶開封尹以下內外文武官遞進數爵

五年春正月庚子授前盧縣尉鄧陵許永爲鄧陵令以便養親  
時永年七十有五父瓊年九十九兩兄皆八十詔召赴闕厚賜  
之閏二月壬辰賜進士安守亮等十一人夏五月大雨河決上  
語曹翰朕信宿以來焚香上禱于天若天災流行願在朕躬勿  
施于民翰頓首曰宋景公一發善言災星退舍今陛下愛民如  
此必不能爲災也又語宰相曰霖雨不止朕日夜焦勞罔知所  
措得非時政闕失使之然耶趙普對曰陛下臨御以來憂勤庶  
務有弊必去聞善必行至於苦雨爲災乃臣等失職上曰朕恐  
掖廷幽閉者衆命遣之時上恭儉不遜聲色自初卽位後宮不  
滿三百具以情言得百名悉厚賜遣之又禁採珠玉罷媚川都  
見皇女永寧公主衣貼綉鋪翠襦入宮中命取之曰王家服此  
宮闈戚里必相倣倣小民逐利展轉販易奢僭實汝之由主慚

謝遂與皇后言我以四海爲富宮殿悉用金銀爲飾力亦可辦  
但念我爲天下守財豈可妄用古稱以一人治天下不以天下  
奉一人其儉德類如此九月丁巳朔日食十二月乙卯大雨雪  
是歲大饑 六年春三月乙卯朔周鄭王邕于房州上素服發  
哀輟朝十日諡曰恭帝還葬慶陵之側號曰順陵庚申覆試進  
士於講武殿擇終場下第并已舉者同試永爲定制賜宋準及  
徐士廉諸科百二十七人及第夏五月行開寶通禮八月甲辰  
趙普罷九月己巳薛居正沈義倫同入相盧多遜參知政事冬  
十月戊子流星出文昌北斗特赦諸官吏奸賊 七年二月庚  
辰朔日食丙戌日有二黑子八月戊子陳州貢芝草一本四十  
九莖上將伐江南遣知制誥李穆諭入朝不赴命梁迥復使亦  
不荅迥回上怒九月癸亥命曹彬潘美等伐之授彬以匣劍副

將而下不用命者斬之諸將皆失色將行夜召彬入禁中語曰  
南方之事一以委卿切勿暴畧生民務廣威信使自歸順不須  
急擊又親酌酒飲彬仍命吳越錢俶舉兵應之閏十月煜遣弟  
從鎰來貢上留不遣尋命李穆送歸手詔促其來降具令諸將  
緩攻而待之八年春正月甲戌朔有事江南不御殿丙子田  
欽祚敗唐兵於溧水斬其統軍張雄彬遂圍金陵雄父子八人  
先爲義軍首領拒周有功歷袁汀二州刺史嘗戒諸子必死國  
難是役也同行者亦沒於他陣乙酉御長春殿語宰相曰朕  
觀爲臣者比多不能有終豈忠孝薄而無以享厚福耶居正等  
頓首謝二月戊辰覆試進士於講武殿賜王嗣宗等三十一人  
諸科紀自成等三十四人及第三月己亥契丹遣使克沙骨悞  
思以書來聘并獻方物遣閣門使郝崇信太常丞呂端報之六



月甲子彗出柳長四丈晨見東方秋七月辛未朔日食癸未酉  
天東印土王子穰結說囉來朝獻已亥山後南林鬼主懷化將  
軍勿尼等來朝獻壬戌契丹遣左衛大將軍耶律霸德等致御  
衣玉帶名馬卽遣校書郎宋準殿直邢文慶充賀正旦使契丹  
亦遣使耶律烏正來賀以後不書西南蕃順化王子若廢等來獻名  
馬金陵被圍自春徂冬勢愈窮威十一月二十七日城陷彬整  
軍成列至其宮城後門燈方開門率衆降彬以禮納之江南平  
得州十九軍三縣一百八十戶六十五萬五千六十挺至羣臣  
稱賀帝泣曰宇縣分割民受其禍攻城之際必有橫罹鋒刃者  
實可哀也辛丑赦江南復一歲兵戈所經二歲仍出米十萬賑  
恤之九年春正月辛未御明德門見李煜以嘗奉正朔命勿  
宣露布止令白衣紗帽至樓下待罪詔升殿撫問封還命侯子

弟臣僚班爵有差壬申大赦減死罪一等二月己未吳越國王  
錢俶偕子惟濬等來朝見於崇德殿三月庚午上以江表底定  
方內大同欲幸西京以行郊禮丙子發京師遂次鞏縣拜安陵  
號慟阻絕久之賜河南今年田租之半奉陵戶復一年辛巳至  
洛陽夏四月庚子有事圓丘還御五鳳樓大赦壬寅大宴賜親  
王近臣列校襲衣金帶鞍馬器幣有差丙午還宮上本生洛陽  
樂其風土欲留都之羣臣與晉王皆言非便上心猶未已謂久  
當遷長安晉王問故上曰無他欲據山河之勝減去冗兵循周  
漢故事以安天下也六月乙卯災惑入南斗秋七月晉王疾亟  
數往視之戊辰幸其第友愛彌篤每對近臣言他日必爲太平  
天子八月命党進潘美楊光美牛思進米文義率兵分五路以  
攻太原又遣郭進郝崇信王政忠閻彥進齊趙孫宴宣安守忠

齊延琛穆彥璋等攻忻代汾沁遼石等州諸將所向克捷進敗  
漢兵於太原城北漢主急求救於遼遼主遣其將耶律沙救之  
冬十月癸丑夕帝崩於萬歲殿在位十七年壽五十殯于殿西  
階遵昭憲太后治命迎晉王卽皇帝位諡曰英武聖文神德皇  
帝廟號太祖葬于永昌陵祥符初加諡曰啓運立極英武睿文  
神德聖功至明大孝皇帝 帝性孝友節儉質任自然不事矯  
飾宮中葦簾緣用青布常服之衣澣濯至再恒戒宮庭生長富  
貴當念惜福受禪之初頗好微行或諫其輒出曰帝王之典自  
有天命周世宗見諸將方面大耳者皆殺之我終日侍側不能  
害也旣而曰有天命者任自爲之亦不汝禁一日罷朝坐便殿  
久不樂左右請其故曰爾謂爲天子容易耶早作乘快誤決一  
事故不樂耳吳越錢俶來朝自宰相以下咸請留之不聽卒遣

歸國倣自是感懼遂乞納土南漢劉鋹在國時好醢毒臣下既  
歸朝從幸講武池帝酌卮酒以賜鋹疑有毒捧盃泣曰臣罪在  
不赦陛下既待臣以不死願爲大梁布衣觀太平之盛未敢飲  
此酒帝笑而謂曰朕推赤心於人腹中寧肯爾耶卽取自飲別  
酌以賜見孟果七寶溺器怒曰當以何毒貯食所爲如是不亡  
何待亟命碎之尤注意刑辟謂人命至重定爲折杖法以過減  
徒流杖笞之刑又釋藩鎮兵權杜五代禍亂之源州郡司牧下  
至幕職躬自引對務農興學慎罰薄歛與世休息迄於丕平治  
定功成制禮作樂傳之子孫世有典則三代而降考論聲名文  
物之治道德仁義之風無讓於漢唐規模可謂遠矣初年有州  
百一十一縣六百三十八戶九十六萬七千三百五十三末年  
有府州二百九十七縣一千八十六戶三百九萬五百四十云

冊曰天道循環亂極思治匪直應期實彰上瑞治隆俗美  
增光五季資邁倫彝學驗行事宅心蕩平洞見大意傳世  
十五南北分異猶思遺德方顯錫類

天王 宋一之二上

太宗皇帝諱炁初名匡義改賜光義卽位改今諱母杜太后夢  
神人捧日授而有娠以晉天福四年十月甲辰生帝於浚儀官  
舍是夜赤光上騰如火閭巷聞有異香自幼不羣與張道張文  
旦同鄉校及長隆準龍顏望之知爲大人性嗜學宜祖總兵淮  
南破州縣財物悉不取第求古書遺之恒飭屬向學由是益工  
文業多藝能仕周至供奉官都知諸軍密教時帝與趙普先預  
其謀分部諸將環列待旦遣牙隊軍使郭延斌馳騎入京報石  
守信王審珂二人然後與普入帳白之太祖時被酒臥欠仲徐

起諸將扶太祖上馬帝卽進前叩馬曰夫濟天下者當使百姓  
戴若父母京師天下根本願號令諸將禁戢攘奪太祖稱善及  
受禪以爲殿前都虞候領睦州防禦使親征澤潞揚州皆爲大  
內都點檢部署留鎮尋領泰寧軍節度使加同平章事建隆二  
年六月壬申行開封尹乾德二年爲中書令征太原改東都留  
守列陽門戟十四開寶六年封晉王兼侍中班宰相上太祖崩  
之明日甲寅卽皇帝位乙卯大赦常所不原者咸除之羣臣有  
所論列並許實封以聞須面奏者問門卽時引對丙辰羣臣表  
請聽政不許丁巳宰相薛居正等固請卽日移御長春殿內外  
官進秩有差十一月癸亥朔不視朝庚午詔諸道轉運使察州  
縣官吏能否第爲三等歲終以聞己丑遣著作郎馮正佐郎張  
玘使契丹告哀詔文武官由詭累不齒者有司毋得更論前題

十二月己亥置直舍人院并三司副使甲寅御乾元殿受朝樂縣而不作大赦改開寶九年爲太平興國元年戊午契丹遣使來聘己未幸講武池罷河東兵庚申節度使趙普向拱張永德高懷德馮繼業張美劉廷讓皆來朝

二年春正月壬戌朔大行殯不視朝戊辰賜進士呂蒙正等一百九人以張齊賢下第特命一榜盡賜及第又思振拔淹滯詔禮部閱其十舉至十五舉者百三十人及諸科二百七人並賜出身又賜同三傳出身共五百餘人皆給綠袍靴帶賜宴于開寶寺御製詩二章賜之辛卯置江南榷茶場嚴茶鹽禁二月甲午契丹遣使來賀卽位及正旦并會葬三月乙卯趙普復用己卯祔太祖神主于廟以孝明皇后配十月辛酉帝生日爲乾明節契丹來賀爲常己巳羣臣請舉樂表三上從之初榷酒酤十

一月丁亥朔日食既庚寅日南至帝始受朝 三年春正月丙戌朔不受朝羣臣詣閣賀己酉命脩太祖實錄上幸三館以其屋舍卑隘詔經度東升龍門舊車輅院爲崇文院遷三館書八萬卷貯焉三月壽州甘露降四月乙亥置諸道轉運判官己卯陳洪進獻漳泉二州以爲武寧軍節度使同平章事凡得縣十四戶十五萬一千九百七十八兵萬八千七百二十七赦其境內給復一年五月乙酉帝御崇元殿受兩浙錢俵納土封爲淮海國王諸弟子及將校各授官凡得州十三軍一縣八十六戶五十五萬六百八十兵一十一萬五千三十六戊子赦兩浙給復如漳泉秋七月以孔宏襲封文宣公自顯德中遣使均田抑爲編戶至是特復其家九月賜進士胡旦等七十四人冬十一月丙申有事于圓丘奉太祖配大赦御乾元殿羣臣上尊號曰



應運統天聖明文武皇帝中外文武加恩初置簽署樞密院事以石熙載爲之四年春正月司天監學生巴人張思訓本唐李淳風聚令瓚之法創作渾儀以獻日月行度成于自然不假人運尤爲精妙二月上親征北漢諭齊王延美誓以必取又問樞密曹彬周世宗及太祖皆親征太原以當時兵力而不能克何也彬言世宗時史超敗於石嶺關人情震恐故師還太祖頓兵甘草地中軍人多被腹疾遂中止以今兵甲精銳人心欣戴伐之如摧枯拉朽其勢甚易上意遂決庚寅以潘美總兵分命崔彥進李漢瓊劉遇曹翰四面進討金錫宴長春殿賜襲衣金帶鞍馬壬子幸國子監遂幸玉津園宴射甲子發京師三月庚辰朔次鎮州郭進大破契丹援兵耶律沙僅以身免夏四月庚午駕次太原連遣使詔諭劉繼元壬申幸城西督諸將發機石

攻城甲戌幸諸砦及長連城五月己卯朔獲其宣徽使范超斬  
蘇下壬午騎帥郭萬超來降癸未夜繼元遣使納款甲申帝幸  
北城受其降北漢平凡得州十縣四十戶三萬五千兵三萬帝  
作平晉詩從臣皆和乙酉赦河東常所不原錄死事將校子孫  
瘞戰士戊子改榆次縣爲新并州優賞歸順將校汾州節度使  
蔚進降乙未築新城盡徙餘民庚子發太原六月庚申自將伐  
契丹丁卯次東易州刺史劉宇以城降留兵千人守之戊辰次  
涿州判官劉厚德降庚午次幽州城南駐蹕寶光寺契丹軍城  
北帝率衆擊走之王申分兵四面攻城契丹鐵林廂主李札盧  
存以所部來降癸酉移幸城北督諸將進兵獲馬三百幽州神  
武廳直并鄉兵四百人來降丁丑帝乘輦督攻城燕守臣耶律  
學古悉力備禦不能支秋七月庚辰遼知順州劉廷素薊州劉

守恩皆來降遼主遣耶律休哥救燕癸未帝督諸軍戰于高粱河耶律沙敗將遁休哥兵適至與耶律斜軫分左右翼以進復戰王師敗績死者萬餘甲申班師休哥追至涿州帝急乘驢車走免喪其資械不可勝計乙巳駕至京遼好遂絕甲戌德昭自殺九月庚辰朔日食丁亥遼復來報圍燕之役丙午劉廷翰與戰于遂城西大敗之斬首萬三百級獲三將馬萬匹冬十月乙亥賞北漢功文武官進秩有差五年春正月庚寅改端明殿爲文明殿以程羽爲學士二月定差役法分民戶爲九等上四等充役下五等免閏三月甲寅賜進士蘇易簡等一百二十二

人秋七月丁未討交州黎桓九月癸卯黎桓遣使上表爲丁璿求襲位不報甲辰上太祖實錄冬十月戊寅遼主賢自將圍瓦橋關帝大發兵屯關南及鎮定州大敗耶律休哥追至莫州十

一月下詔親征壬子發京師癸丑次長垣縣諸將與遼將大破之戊午駐蹕大名府復大戰于莫州王師敗績會遼主引去帝欲取幽州李昉張齊賢力陳未可戊寅班師庚辰發大名府乙酉至京師六年春三月巳酉興元尹德芳薨壬戌交州行營破賊于白藤江口獲戰艦二百艘知邕州侯仁貴死之會炎樞軍士多死驛詔轉運使許仲宣班師九月乙未朔日食甲辰以田錫爲左拾遺丙午初置京朝官差遣院令中書舍人郭贊等考校課績習郎舊僚柴禹錫趙銘楊守一告秦王延美驕恣將有陰謀竊發壬子詔求直言十一月辛亥祀圜丘大赦御乾元殿羣臣上尊號曰應運統天睿文英武大聖至明廣孝皇帝內外文武加恩是歲始用文資任樞密使以石熙載爲之七年春三月癸巳朔日食乙未趙普告秦王陰事上不忍暴白出爲

西京留守普益聚得盧多遜堂吏趙白以機事密告秦王願宮  
車宴駕盡力事大王王遣小吏樊德明報言正合我意因遣之  
弓箭多遜受之事聞下御史獄命承旨李昉學士扈蒙衛尉卿  
崔仁冀御史滕中正等雜治具伏其辜獄上詔文武常朝官集  
議朝堂太師王溥等七十四人奏王與多遜咀咒顧望大逆不  
道宜行誅滅以正刑章丁丑詔赦廷美白與德明以下悉斬都  
門外五月己酉夏州定難留後李繼捧來歸獻其部內銀夏綏  
宥四州留若京師四州旣歸疆土幾復漢唐之舊其未入職方  
者燕雲十六州耳六月乙亥族弟繼遷奔于地斤澤十月癸卯  
乾元曆成十一月戊午朔日食 八年春正月癸未詔令州縣  
長吏延問高年耆德二月戊子朔日食三月癸亥分三司各置  
使丙子親試禮部舉人于講武殿擢王則以下百七十餘人立

爲定制始分三甲賜宴瓊林苑夏四月壬寅班州縣戒諭辭至  
之黎桓逐丁璿自稱留後遣使來貢已酉兗州瑕丘等七縣民  
并泰山父老詣闕請封禪冬十月戊戌改諸皇子元佐等名並  
加檢校太保同平章事時諸王尚幼欲其知謙抑之道令班宰  
相下詔曰宰相之任實總百揆于羣臣禮絕藩邸之設止奉朝  
請而已又置諸王府咨議翊善侍讀等官以王適姚坦邢昺等  
爲之上以敦朴示天下先因宴餞趙普樞密使王顯等侍側見  
所衣袴澣濯頻頻文理俱側因贊聖德十一月除平章事宋琪  
李昉叅知政事李穆呂蒙正李至簽書樞密院張齊賢王沔等  
入謝上曰朕爲官擇人惟恐不當卿等皆文學適用操履方潔  
故加獎擢咸頓首謝庚辰置翰林侍讀官帝天性雅好文墨篤  
意問學自居藩至踐祚多所述作車駕征行不廢吟詠聽政之

暇日閱經史禁中建清心殿收藏圖籍以資游覽又慮顧問缺人用呂文仲爲侍讀王著爲侍書每名邢昺張奭等更迭講說質問疑議詔史館脩太平御覽一千卷又編禪官之說有可採者爲五百卷名太平廣記

雍熙元年春正月詔曰教化之本治亂之原皆存方冊苟無書籍何以取法今三館所貯遺帙尚多中外有以書來上及三百卷當議甄錄酬獎餘第卷帙之數等級優賜不願送官者借其本寫之自此四方之書間出三月除楊延慶等爲知州帝語宋琪曰刺史之任最爲親民苟非其人民受其禍昔秦彭守潁川教化大行境內多瑞以一郡而天應之若此况君天下者乎夏四月戊子羣臣表請封禪上許之將以十一月行事命學士扈蒙等詳定儀注五月丁丑乾元文明二殿災六月丁亥詔求直

言田錫疏言時久昇平左趣右奉致陛下以功業自多自謂太  
平至理誰敢不以爲然雖有刑罰未中任情遠理誰則言之今  
宰相不得用人近臣不專受責給事中左右補闕不舉其職致  
陛下有朝令夕改捨近謀遠之事又聽用太廣條制必繁條制  
既繁依從者少自今凡有章奏幸令大臣議而行之毋使垂之  
空言宰相旣賢當信而用之非賢當擇而任之何以置之爲具  
臣而疑之若衆人也壬寅詔罷封禪秋七月壬子改乾元殿爲  
朝元殿文明殿爲文德殿丹鳳門爲乾元門命諫官領登聞檢  
院語以刑辟之際君子所當盡心稍有冤枉必傷和氣水旱作  
沴實由于此居官牧民尤當戒之時移吳中太一宮作於都城  
南八月丁酉上親祠之冬十月癸巳嵐州獻牝獸一角并瑞物  
六十三種圖付史館十一月丁巳祀圜丘大赦改元羣臣上尊



號增至仁明德四字中外文武進秩有差有察再思勸勿教上以問宰相對曰聖明開創以來俱存弊典三年郊祀既畢恩賞所謂其仁如天堯舜之道上然之十二月癸未賜京畿高年帛御乾元門觀醵三日十二月壬辰立德妃李氏爲皇后時後宮不過三百人上猶以爲多徐思併省摠非掌事者出而嫁之二年春正月己未賜進士梁灝等二百五十八人夏四月乙亥朔遣使賑江南諸州饑及察官吏能否時四方無事上召輔臣三司翰林樞密三館學士以下尚書四品兩省五品以上宴于後苑因命賦詩賞花釣魚習射水心殿近臣曲宴自茲始又福閣班簿欲擇河北運使一人多不詳操履因命宰相自今臣僚授任並具履歷引對所冀觀其才質若懷材隱智之士可因此抽揚或負瑕缺瀆之人憎其愧耻足以懲惡勸善庚戌重九賜

近臣飲于李昉第召諸王節度使宴射苑中是夕楚王宮火辛亥詔廢元佐爲庶人閏九月癸未太白入南斗十二月庚子朔日食上每自勤不怠嘗錄繁囚決事至日盱近臣以爲勞上曰不然儻患及無告獄得平允朕意深以爲適何勞之有自今中外臣僚若能留心政務天下安有不治朕此志必無改易又語宋琪等曰珍禽奇獸非朕所尚但方內太平此爲上瑞也三年春正月庚辰夜漏一刻北方有赤氣如城至明不散己丑知雄州賀令圖上言契丹主幼國事決于其母請乘機取燕薊故地庚寅置四行營都部署馬步水陸並進戒諭諸將持重緩行不得貪利三月癸酉曹彬與戰克固安涿州殺遼相賀斯丁丑潘美自西陞入與鹵遇追至寰州刺史趙彥辛以城降辛巳圖朔州丁亥至應州副節度趙希贊艾正觀察判官宋雄各以城

降癸未田重進連下飛狐靈州等城進攻蔚州守將呂行德張繼從劉知進穆超等各舉城降夏四月辛丑潘美克雲州壬寅米信戰新城東北破之各書奏捷帝每訝其進軍太速五月庚午耶律休哥以兵薄王師逆戰於岐溝關彬等敗績丙子召彬信彥進歸闕命重進屯定州美還代州徙雲應寰朔吏民及吐渾部族分置河東京西會契丹復陷寰州楊業護送遷民遇之苦戰而死六月戊戌朔日食秋七月庚午貶諸將失律之罪贈業太尉以張齊賢知代州敗契丹兵於土鏐砦殺其國舅詳穩撻烈哥宮使蕭打旱冬十月庚申交趾黎桓來求節鎮朝廷懲孫全興之敗許之以爲靜海軍節度使丁氏由是遂亡十二月壬寅劉廷讓敗績於君子館執先鋒賀令圖遂陷邢深德三州楊重進死之四年春正月契丹入深祈德易等州攻陷州郡

俘掠士民魏博以北咸被其禍丙戌下詔哀痛煇暴骸行營將士戰敗潰散者並釋不問緣邊備禦城堡有勞可紀者所在以聞文武死事者廩給其家錄其子孫獨河北雍熙三年以前通租賦所蹂踐給復三年軍過二年餘一年夏四月癸巳朔併水陸發逆爲一司冬十二月詔以取士之職歸于有司前此上親閱試宰相累請如唐故事歲命春官知貢舉從之

弘簡錄卷八十七

明刑部員外郎仁和弘齋邵經邦學

皇清翰林院侍講學士四世孫遠平校閱

天王 宋一之二下

太宗端拱元年春正月乙亥親耕籍田還御丹鳳樓大赦改元  
進封陳王以下內外文武有差賜京城高年帛名前青州錄事  
叅軍麻希夢至闕年九十餘上御便殿賜坐從容訪以民間利  
病多見采納復問攝生之理對曰臣無他術惟少情寡慾節聲  
色薄滋味上嘉之賜以金紫致仕二月乙未以舊制臺諫有名  
而不得行其職失建官本意易以新名改左右拾遺補闕爲左  
右司諫正言李昉罷復用趙普守太保兼侍中呂蒙正同平章  
事諭普勿以位高自縱勿以權勢自驕但能謹法度舉賢能明

實罰弭愛憎何憂不治又曰卿勿面從古人耻其君不爲堯舜卿其念哉時蒙正新進普開國元老同在相位雅意重之上先讀唐史見馬周故事因問羣臣今世人才復有如馬周否知制誥胡旦等窺上意改脩書翟頴名翟馬周爲作奏誇大自薦普以上聞詔捕頴流海島時李繼遷率衆寇邊討之不克上始有厭兵之意出李繼捧于外繼遷惶懼奉表歸順各賜姓名趙保忠保吉復其北邊互市仍禁戍卒侵掠五月辛酉就崇文院中堂建祕閣分置三館書籍別爲庫目以李至兼祕書監宋祕直祕閣杜鎬爲校理官名始此帝語至等人君當淡然無欲勿使皆好形見于外則奸邪無自而入朕無他好但喜讀書多見古今成敗善者從之不善者改之如斯而已是歲命禮部侍郎宋白知貢舉諸科下第人舉登聞鼓求別試壬寅覆試得馬國祥

以下又命王世則試得合格數百人上覆試詩賦擢葉齊以下共九百餘人並賜及第八月乙卯壽星見丙地庚辰幸太學命博士李覺講易賜帛遂幸玉津園習射是月鳳凰集廣州清遠縣解合歡樹樹下生芝三莖二年春正月詔羣臣上備戎策郎中張洎言中國禦戎惟恃險阻今自飛狐以東地利皆爲契丹所有河朔列城祇可自固請於沿邊建三大鎮各統衆十萬出時而守仍命親王出臨魏府以控其要尚書宋琪言如令大軍於易州循孤山涉涿水抵桑乾河出保安寨東瞰燕城僅及一舍然兵凶器聖人不得已而用之若選使通好弭戰息民此策之上也李昉王禹偁亦以脩好爲言帝嘉納之三月壬寅賜進士陳堯叟等一百八十六人夏四月不雨五月遣使決獄諸州是夕雨戊戌彗出東井三十日上避殿減膳大赦天下是夕

彗滅契丹復入命李繼隆戴興各嚴備禦秋七月辛丑契丹犯威南軍都巡檢使尹繼倫大敗之于徐河殺其相皮室休哥遜去自是不敢大入八月癸亥開寶寺舍利塔成田錫疏諫上不罪九月鎮星熒惑入南斗自秋徂冬不雨下詔罪已省去尊號令四方上表稱稱皇帝呂蒙正奏陛下神功聖德輝映今古尊號可增而不可省請復之不許十二月丙辰大雨雪辛酉羣臣再上尊號法天崇道文武皇帝詔去文武二字餘許之

淳化元年春正月戊寅朔受尊號改元減京畿繁囚流罪以下一等加內外文武官勲爵應監子官賜鰥寡孤獨錢除逋負改乾明節爲壽寧節大明殿爲含光殿五月鑄淳化通寶錢六月庚午太白晝見秋七月丁丑復見八月己巳毀左藏庫金銀器皿上性節儉退朝常著華陽巾布褐絲絛內服惟純絹乘輿給



用無所損益九月辛巳焚惑入太微垣冬十月乙巳陵左執法  
十一月戊戌太白晝見辛酉因謝泌請羣臣升殿皆許言事可  
者皆得專達于有司頗容巧佞詔自今中外上書及面奏制可  
者政事送中書兵機送樞密財貨送三司申覆然後頒行者爲  
定制其弊遂革二年春正月不雨至于三月天下諸州連歲  
旱蝗是年尤甚詔欲以身爲犧牲焚于烈火恐未足以答天譴  
富與宰臣等商刑政闕失惻稼穡艱難恤物安人以和玄祐翌  
日大雨蝗盡死丙戌焚惑犯房閭二月辛未朔日食秋八月禁  
中置審刑院凡獄具上奏申審刑院印訖以付大理刑部斷覆  
以聞復下審刑院裁決以付中書當者卽行否則復以聞始命  
論決九月丁酉始置知樞密院同知樞密院事以張遜溫仲舒  
寇準爲之十二月丙寅朔行入閭儀女真言契丹以兵隔其朝

貢之路表請伐之詔不許自是遂屬契丹三年春二月乙丑朔日食三月戊戌賜進士孫何等三百五十人六月丁丑大風晝晦辛卯京師置常平倉十二月議以明年合祭天地四年春正月辛卯祀圜丘以宣太二祖配大赦二月己未朔日食丙戌改磨勘院爲審官院以主京朝官考課又置考課院以主幕職州縣官夏五月青城民王小波聚衆爲亂上顧近臣蜀土繁盛但習俗黨浮多事遊賞今小寇警動豈天意抑其浮華耶呂蒙正對以物極必反此理誠然呂端亦勸帝留意乃下詔諸州官買諸物非風土所宜而長吏不以言及調役飛輓不均州縣因循不奏咸條析以聞八月丙辰朔日食自七月大雨至于九月澶州河水決涪州江溢陳頴宋亳間盜賊並起詔給死者歛具廢廩以振上以陰陽愆和切責宰相李昉叅政賈黃中李沆

樞密溫仲舒並罷以呂蒙正同平章事蘇易簡趙昌言叅知政  
事趙鎔向敏中同知樞密院事分天下爲十道河南河東關西  
劍南淮南江西兩浙兩廣兩京爲左右路各置判官領之閏月  
置三司使二員已酉置三司總計度使以陳恕爲之十二月戊  
申西川都巡檢使張玘與賊戰江原縣死之小波亦死衆推其  
黨李順爲帥陷漢興彭州衆至數萬五年春正月京西江浙  
大饑遣使分詣諸道巡撫知蔡州張榮因饑民相率持挺強取  
民粟取爲首者杖脊餘悉從宜事聞詔褒之李順陷成都據其  
城四出攻劫遣昭宣使王繼恩等往討之夏四月平劍州進克  
閬綿二州五月至成都獲順及僞官誅之成都平降其府爲益  
州丙戌置起居院復脩起居注庚辰初伏帝書綾扇賜近臣九  
月壬申皇子襄王尹開封大赦丁丑蜀部漸平下詔罪已丙寅

幸國子監講尚書說命三篇賜直講孫奭排魚東帛因幸武成王廟十二月戊寅朔日當食雲陰不見幸以三司總計使不便復以兩京十道歸三部各置使一員每部置判官推官都監分勾院爲三

至道元年春正月戊申朔改元赦丙辰上清宮成辛酉上御乾元門觀燈賜從臣宴二月旱甲申命宰相行禮丙午雨詔以倉菽貸民爲種有司請量留以食國馬上不聽謂甘雨沾洽土膏所起至秋有萬倍之獲國馬纔食芻藁足矣是月嘉州兩賊帥張餘首送西川行營餘黨悉平三月庚申詔求直言夏四月癸未詔以中書多務使均勞逸以呂蒙正爲右僕射呂端戶部侍郎同平章事乙酉閔寶皇后宋氏疾甚遷于故燕國長公主第甲辰崩權殯普濟禪舍羣臣不成服翰林學士王禹偁上言后

嘗母儀天下當遵用舊禮帝不悅坐謫訓貴知滁州八月壬辰  
御朝元殿冊立壽王元侃爲皇太子大赦文武常參官子爲父  
後見任官者賜勲一級自唐天祐以來中國多故立儲之禮廢  
及百年至是始舉而行之癸巳以左丞李至侍郎李沆並兼太  
子賓客詔特異其禮數每見必先拜至等上表不敢當詔不許  
復相率謝諭以太子賢明仁孝可盡心規誨動皆由禮事有未  
當必須力言至於禮樂詩書義可裨益者皆卿等素習不假朕  
言也冬十月甲戌朔皇太子讓宮僚稱臣許之十一月己未閣  
武便殿二年春正月辛亥祈穀時圖丘禮成大赦中外文武  
加恩戒諸路州府不得以珍禽奇獸諸祥瑞來獻秋九月命李  
繼隆等分五路出討李繼遷無功而還丙戌環慶諸州地晝夜  
十二震十二月甲寅雨雪是歲大有年三年春正月分天下

爲十五道京東西河南北陝西江東西浙東淮南西荆湖福建  
劍南東西廣南各置轉運使二月辛丑帝不豫始決事於便殿  
甲辰降京畿死罪囚流以下釋之三月壬辰不視朝癸巳追班  
千萬歲殿宣詔令皇太子柩前卽位是日帝崩殯于殿之西階  
年五十九在位二十二年帝至誠御下任人不疑虛懷聽納雖  
布衣疎賤必溫顏接訪以盡其意縱有辭法狂悖未嘗加罪嘗  
語侍臣昔禹拜昌言世稱其美苟諫者真能救朕之失豈惜夏  
禹之拜乎初太祖嘗曰軍旅饑饉當預爲之備不可臨事厚歛  
於民旣平諸國珍寶金帛填溢及收天下財貢盡入左藏庫帝  
分左藏北庫爲內藏庫語左右曰朕置內藏蓋慮司計之臣不  
能節約異時用度有闕更取於民朕終不敢以此自供嗜好也  
又晉漢以來主暗臣慝分凌勢削帝卽位革故鼎新創立一代

之法于時大臣皆舊德耆年猶有異論帝守之愈固不救其說  
晝夜勤行又如中書布政庶官除授前代皆出堂吏之手天下  
安有不亂帝勤於聽政凡四方及百司庶務雖至微細皆一一  
留心躋于治平雖未能上比往聖至肅清寰宇脩明憲度絕奸  
弊之原亦無慙於古矣羣臣上尊諡曰神功聖德文武皇帝廟  
號太宗葬永熙陵祥符初加諡至仁應道神功聖德文武大明  
廣孝皇帝

冊曰陳橋密謀帝普捧日金甌禪盟后知其一延美何功  
肯爲造膝初心再謀亦匪無術發之未善小人害嫉所以  
君子無莫無適燭影斧聲全無事實人品胸襟大非祖匹  
一言勿遠負於其姪千載嗷嗷待彰直筆

天王 宋一之三

真宗皇帝諱恒太宗第三子母妃李氏於五星聚奎之明年正月夢以衣承口有娠十二月二日生于開封府第赤光照室左足指有文成天字自幼英睿姿容特異與諸王嬉戲好作戰陣之狀自稱元帥太祖鍾愛育於宮中嘗登萬歲殿升御榻坐太祖大奇之撫問天子好作否對曰由天命耳比就學受經一覽成誦初名德昌授檢校太保同中書門下平章事封常王再改元休封襄王改元侃又進壽王加檢校太傅開封尹立爲皇太子賜今諱仍判府事素留心獄訟遇有政務裁決輕重靡不稱愜京獄屢空詔書嘉美遣制卽位稱太祖爲皇伯考夏四月乙未尊皇后爲皇太后大赦天下丙申羣臣請聽政表三上從之戊戌見于崇政殿西序各賜器幣癸卯追復秦王廷美贈兄德昭德芳併弟元份等各進封爵中外羣臣進秩一等乙卯加黎



桓兼侍中追封南平王五月丁卯詔求直言甲戌討立楚王之  
罪貶降李昌齡王繼恩胡旦李繼勲等有差釋其餘黨丙戌封  
姊秦晉許國妹宣慈賢懿壽昌萬壽並爲長公主丁亥立秦國  
夫人郭氏爲皇后六月乙未以大行聖蹟賜天下名山己亥上  
大行皇帝諡辛丑罷獻祥瑞甲辰復封兄元佐楚王弟元億代  
國公乙巳追冊莒國夫人潘氏爲皇后諡莊懷上問錢若水近  
臣可大用者因薦中書舍人王旦上曰此固朕所屬也秋八月  
戊申太白犯太微戊午焚馭入東井九月戊寅以孔子四十五  
世孫延世爲曲阜令襲封文宣公冬十月丁巳歲星入氐賜山  
陵使以下銀帛民兄役者蠲租有差十一月甲子祔太宗神主  
于太廟以懿德皇后配祔莊懷皇后於別廟丙寅詔兩京死罪  
以下遞減一等己巳詔錢若水等脩太宗實錄十二月癸巳帝

生日爲承天節羣臣上壽於崇德殿契丹遣使來賀丙申追尊  
母賢妃李氏爲皇太后加乳母齊國夫人劉氏延壽保聖之號  
咸平元年春正月辛酉下詔改元丙寅上皇太后李氏諡曰元  
德丁丑召學官崔熙正日赴御書院侍講上勤於政事日御前  
殿罷朝復臨後殿閱視諸司及軍事午後召儒臣詢問得失常  
至夜分因命宰臣選明經術者以聞戊寅閱御龍直甲申彗出  
營室北避殿減膳呂端等言應在齊魯帝曰朕以天下爲憂豈  
直一方耶詔求直言田錫論不當與繼遷夏州又不合呼爲趙  
保吉時事舛誤莫此爲大今密院公事宰相不與聞中書政事  
樞密不預議以致兵謀不精國計未善疏奏卽日召對乙未慮  
囚老幼疾病流以下聽贖杖以下釋之丁酉彗滅三月壬申賜  
進士孫僅等五十人夏五月戊午朔日食甲子祈雨幸大相國

寺升殿而兩六月辛卯詔曰轉運使副之職在乎督餽護計貨  
儲察官吏之能否訪生民之利病至於招復流離勸課田疇理  
獄訟之冤提簿領之要其責既重其務實繁苟非徇公滅私正  
已率下則宵旰之寄何所望焉其令近臣舉才堪運使三司舉  
堪知州者任之更迭赴闕訪以民事申飭令長勸農如有灼然  
才行爲衆所推朕不吝美官特與升陟如但因循贖職貪虐害  
人大則正以刑章小則黜之散地信實必罰朕不食言九月己  
巳詔呂端錢若水重脩太祖實錄冬十月丙戌朔日食丙午許  
羣臣以著述詣閣獻令兩制銓簡十一月甲子詔詳歷代帝王  
陵廟 二年春三月賜進士孫暨等七十一人閏三月旱求直  
言運副朱台符上疏優詔褒荅夏六月戊午帝臨問曹彬疾因  
詢以契丹事宜對曰太祖以英武定天下猶經營和好帝曰此

事朕當屈意爲天下蒼生然須執綱紀存大體卽久遠之利也  
帝以郭贇知天雄軍懸闕不行怒曰朕初嗣位委以全魏重地  
而不肯去何以使人將資之羣臣聞者益皆畏服內品高班裴  
愈使交州還言龍花蕝難得之物宜充貢上怒曰朕懷撫遠俗  
何有所求卽下御史臺劾問黜隸崖州秋七月甲辰幸國子監  
名崔倕佺講尚書大禹謨還幸崇文院賜祕書監祭酒以下器  
幣丙午置翰林侍讀侍講學士以楊徽之夏侯嶠呂文仲邢昺  
爲之八月丁巳大宴崇德殿始作樂丙寅大閱於東北郊九月  
庚辰朔日食冬十月契丹隆緒寇瀛州康保裔宋順死之喪其  
器械又侵遂州守將楊延昭拒之十一月乙酉饗太廟丙戌祀  
圜丘以二聖配大赦天下錄功臣子孫之無祿者禮畢御朝元  
殿受冊羣臣上尊號曰崇文廣武聖明仁孝皇帝中外悉加恩

乙未自將禦契丹詔幸河北所次頓舍給用毋泛及州縣十二  
月辛亥賜諸將近臣戎服廐馬甲寅發京師戊午駐蹕澶州知  
冀州張旻敗契丹於城南殺千餘人奪馬百餘匹辛酉宴從臣  
于行宮以王超等督先鋒示以陣圖俾識部分壬戌幸浮橋登  
臨河亭台見澶州父老賜錦袍茶帛甲子次大名躬御鎧甲於  
中軍契丹攻威遠軍知府州折維昌擊敗之殺其酋帥入契丹  
五合州拔黃太尉砦殲其衆焚獲車帳馬牛萬計 三年春正  
月己卯朔駐蹕大名府契丹知之乃縱掠而去范廷召等追敗  
之于莫州斬首萬餘級盡獲所掠餘寇遁出境甲午駕還聞益  
州戍卒作亂推王均爲首命雷有終等往討給以步騎八千庚  
子駕入京二月丁卯有終等爲賊所敗御廚使李惠死之三月  
戊寅朔日食夏四月戊申朔賜進士陳堯咨等四百九人六月

已未太白晝見時兩河大兵之後江浙又饑上命向敏中宣撫河北河東夏侯嶠邢昺巡撫江浙冬十月有終大敗賊黨殺三千餘人遂復益州追殺均于富順監餘黨悉平丙寅命王欽若梁顥安撫川峽辛卯日南至御朝元殿受朝 四年春上開封事多言三司官吏稽習依違天下文牒有五七歲不決者因詔馮拯陳堯叟共議減三司冗事及參決滯務命督欠司引逋負官物人于崇政殿躬自臨問凡七日釋二千六百餘人除逋負二百六十餘萬二月詔舉賢良方正能直言極諫以直集賢院田錫祕書丞查道何亮進士陳越推官孫暨王晦叔孫僅王薄丁遜應遜三月辛巳分川峽爲益利梓夔四路上嘗與宰相語及天下兵馬數雖不少精銳者鮮且今之兵與古不同古者三時務農一時教戰今惟坐待衣食不可不精意選練六月丁卯

詔州縣學校及聚徒講誦之所並賜九經時議靈州棄守輔臣  
多謂必爭之地不可棄張齊賢李沆楊億言靈武孤城必難固  
守徒使軍民六七萬陷于危亡之地帝不從八月遣齊賢行邊  
齊賢請募江南丁壯以益戍兵帝以爲不惟動搖人心且使南  
人遠戍西鄙深爲未便遂寢其奏九月慶州地震者再李繼遷  
陷清遠軍楊瓊等七將擁兵不救曹瑋引蕃兵邀其輜重於唐  
龍鎮詔授西涼六谷會長潘羅支以官命出兵助討冬十月契  
丹入寇張斌等破之于長城口獲統軍鐵林等遂遁去十二月  
丙寅太白晝見南斗巳卯命張齊賢賑河北饑 五年春三月  
丁酉帝問李繼遷陷靈州深悔不用棄者之言巳未賜進士王  
曾等三十八人命三司較戶口以一歲所入太約入少用多且  
河北歲屯重兵供億至廣庚子詔減冗食并諸路官吏計十九

萬五千餘人三司使王嗣宗又奏今國家經費實繁用度不足  
明年又將郊祀因會議條上應奉諸雜物可減者十萬六千工  
作可省者九萬七千悉允而行之上嘗幸龍門觀巖崖石佛經  
會昌毀皆已摧壞左右奏非官爲葺治不能成此勝跡上以軍  
國用度不欲以率外教不聽六月都城大雨壞民廬舍有壓死  
者振恤其家秋七月甲午朔日食辛丑享太廟壬寅祀圜丘大  
赦賜百歲老人京城祝道官爵一級白州民黃受粟帛封皇  
子元祐信國公親王大臣進爵有差 六年夏四月李繼遷寇  
洪德砦蕃官慶香虬移慶等擊走之以慶香等領刺史契丹來  
侵王繼忠與戰於望都兵敗被執五月甲午太白晝見趙保吉  
陷西涼知州丁惟清死之潘羅支救西涼遂殺保吉子德明嗣  
時河北用兵二十年中國恒有西顧之憂曹瑋請乘機撲滅不



報三司使陳恕在職久上命條具中外錢穀恕恐啓上侈心久不進屢詔趣之六月以疾求退特薦寇準自代仍併鹽鐵度支戶部三司共置一使各增副使八月庚午太白晝見上語樞密使王繼英比年邊防止及西北至於遠方殊俗多無禦備如川廣荆湖常須訓齊軍伍不可以闕冬十一月有星孛于井鬼詔求直言

景德元年春正月丙戌朔大赦改元丙申京師地震者三邢與瀛州震不止三月己亥皇太后李氏崩羣臣三上表請聽政不允退上五表言西北軍事方殷力請聽政從之己酉帝衰服慟哭始於崇政殿西廡見羣臣夏四月甲寅上大行皇太后諡曰明德從羣臣三請始御正殿秋九月乙亥契丹大舉入寇詔宰相議親征契丹駐兵陽城淀因王繼忠致書於莫州石普請講

和普馳奏闕下上遣問門祇候曹利用往答之諭宰相曰繼忠雖言請和然河水已合且其情多詐不可不爲之備十一月辛亥太白晝見契丹攻瀛州知州李延渥率兵敗之遂逼冀州知州王瓌擊走之甲子石州地震庚午車駕北巡司天奏日抱珥黃氣充塞宜不戰而却癸酉駐蹕常城縣寒甚左右進貂帽毳裘却之曰士衆皆苦寒朕安用此契丹兵至澶州北直犯前軍西統軍撻覽耀兵出陣中伏弩而死丙子帝次澶州渡河幸北砦御城北樓名諸將撫慰十二月庚辰朔日食利用及契丹使韓杞奉書而來和議遂決賜杞襲衣金帶仍同利用復書以報甲申契丹使姚東之來獻御衣食物利用還傳其國母命起居聖躬乙酉御行營南樓觀河遂宴從官東之預焉甲午車駕發澶州乙未李繼昌及契丹使丁振以誓書來稱南朝爲兄北朝

爲第定歲幣絹二十萬匹銀一十萬兩交誓約解兵歸丁酉  
契丹兵出塞戊戌入京皇太后祔廟辛丑錄誓辭願河北河東  
諸州遣使撫問官吏將卒訪察功狀優恤傷殘追錄死事子孫  
甲辰改威遠諸軍名二年春正月庚戌朔大赦天下上以南  
北弭兵放散河北諸州強壯歸農令有司市給耕牛罷諸路行  
營合鎮定兩路都部署爲一省北面部署鈐轄都監使臣二百  
九十餘員河北戍兵十之五緣邊三之一招流亡廣儲畜息飛  
輓罷權酷收瘞戰沒遺骸致祭取淮楚間踏犁式頒之河朔民  
得安業二月令嘉邛州鑄大鐵錢復北邊榷場署國信司領以  
宦者專主契丹脩好慶吊盟誓往來癸卯遣太子中允孫奭等  
賀遼國母生辰稱南朝致書北朝皇帝三月甲寅賜進士李迪  
等二百四十人夏四月癸卯王欽若與寇準異議特置資政殿

學士命領之上幸龍圖閣置待制五月戊申幸國子監丁巳司  
天少監史序上乾元寶典秋七月盛度建議增制舉賢良方正  
外又有博通典籍達於教化才識兼茂明於體用諳曉法律按  
章覆問識洞韜畧運籌決勝軍謀宏遠材任邊寄等六科詔中  
書門下試察其才具名聞奏朕臨軒親策之是月歸幣于契丹  
歲以爲常八月有星孛于紫微冬十一月丙辰享太廟丁巳祀  
圜丘大赦羣臣三表請上尊號不許庚申大宴含光殿三年  
春二月戊戌王欽若請罷寇準帝任用王旦以爲平章事語之  
曰準多官人以爲已恩當深戒之三月賜進士姚曄等二百七  
人夏四月復轉對直集賢院任隨言陛下焦勞庶政開求諫之  
門而諫議大夫司諫正言但尸位素祿請申甄黜之典上納之  
五月壬寅日常食不虧周伯星見乙巳太白晝見甲子大宴含

光殿從羣臣之請始用樂九月丙辰御試制科光祿寺丞錢易  
判廣德軍石待問乙丑夏州趙德明遣將劉仁勗奉誓表歸款  
冬十月庚午拜爲定難軍節度使兼侍中封西平王丁酉葬明  
德皇后十二月癸酉太白晝見四年春正月帝如西京謁諸  
陵已未發京師丙寅次永安鎮丁卯帝素服上謁旣畢減諸路  
繫囚張齊賢祭周六廟加以脩葺從官先塋有在洛者賜告祭  
拜增置孔子守塋戶二十癸酉詔西京建太祖神御殿仍立國  
子監武成王廟賜酺三日名父老五百飲于樓下戊子加列子  
號錄唐白居易孫利用爲河南助教增封唐孝子潘良瑗及其  
子季通墓禁樵採辛卯駕還甲午次鄭州遣祀中嶽三月己亥  
入京庚申蠲河南倉庫吏逋負芻糧絹帛四十五萬夏四月辛  
巳皇后郭氏崩諡莊穆五月丙申朔日食壬申親試制科著作

佐郎陳絳丹陽主簿夏竦時維州北海簿徐夷言事上名見問以皇嗣未立其咎安在夷對國家以火德王火生土土主於信今陛下不脩信所以未得皇子上曰朕未嘗失信卿何云此對曰陛下所脩者小信耳若夫帝王之信凡頒一法出一勅不可朝令夕改上然其言卽授衛尉丞宦者王承珪言汀州黔卒王捷于南康遇道人姓趙氏賜以小環神劍自稱司命真君是年五月十三日常降于其家之新堂是爲聖祖帝戒之賜捷名中正由是祥瑞之事起矣六月丁未司天監言五星聚而伏於鶉火乙卯葬莊穆皇后祔于別廟秋七月甲戌宜州兵亂詔閣門使曹利用等討之乙亥交州黎龍廷弒兄自立來貢以爲靜海軍節度使封交趾郡王賜名至忠及九經佛書八月丁未秋宴宰臣請舉樂不允益州與瓦亭砦地皆震辛亥賜孔子四十六

世孫聖佑同學究出身丁巳置龍圖閣學士直學士以杜鎬爲之權三司使丁謂上景德會計錄九月壬辰日上有五色雲冬十月甲午朔日當食雲陰不見利用破陳進於象州斬之擒盧成均優詔進秩賜將士物有差升象州爲防禦赦死罪以下蠲丁錢及夏秋租十一月庚申帝語王旦夜將半忽夢神人云當降天書大中祥符三篇旦等皆稱賀是歲詣路豐稔淮蔡間麥斗十錢粳米斛二百上思西北弭兵天下無事納王欽若言僞作天書同爲遊覽之計

大中祥符元年春正月乙丑皇城司言左承天門南鵬尾有黃帛曳其上上台羣臣拜迎于朝元殿號稱天書遣二內臣升屋奉之以下王旦跪捧而進帝再拜受之付陳堯叟啓封帛上有文曰趙受命興于宋付于脊居其器守于正世七百九九定封

緘甚密其書黃字三幅辭類老子道德經始言帝能以至孝至道紹世次論以清淨簡儉終述世祚延永之意皆欽若爲之也讀訖帝復跪奉醴以所緘帛盛以金匱事之甚謹於是羣臣加益以經義附和而天下爭言祥瑞事矣戊辰大赦改元羣臣加恩賜京師酺三月兖州父老呂良等千二百人諸道科貢士八百四十人及宰臣王旦等率文武百官將校蠻貊耆壽僧道合二萬四千三百七十餘人咸詣闕請封禪表五上夏四月甲午詔以十月有事于泰山遣官奉天書告于天地宗廟社稷嶽瀆諸祠丙午作昭應宮以奉之置天書儀衛使副及扶持都監凡有大禮卽命之五月壬戌欽若言泰山醴泉出錫山蒼龍見命曹利用李神福脩葺道路行宮止加塗墍毋別剏乘輿供帳存於禮文者如舊軍馬所至無壞民稼井居舍什物樹木自離京



至登壇以前皆用法駕不舉樂禁所經州縣以聲伎來迓車中  
外進奉物以銷金文繡爲飾甲申放宮人百二十六月乙未天  
監再降于泰山醴泉北壬寅迎於含芳園止有司奏大辟赦宥  
州繫囚流罪以下秋七月庚申太白晝見八月己酉王欽若獻  
芝草八千餘本趙安仁獻有五色金玉丹紫更多七百餘九月  
戊午遣使詣岳州采三脊茅置園臺泰山上一壇燎壇在其東  
南山下封祀壇四瘞瘞在壬地外遺之內正坐配坐川玉冊六  
副封以金泥印以受命寶皆川石藏藏之累五色土圍封朝覲  
壇在行宮南幣自嶽鎮海濱而下各用其方色牲自神州而上  
十二位用犢其玉牒冊文皆稱嗣皇帝臣某敢昭告于昊天上帝  
后土皇地祇中述太祖開基太宗致治固抑升中以延積慶  
元符錫祚衆寶效祥異域咸懷豐年屢應虔脩封祀祈福黎元

之意乙酉親習儀于崇德殿冬十月戊子上御蔬食從官衛士亦如之禁天下屠殺一月辛卯車駕發京師扶侍使以玉輅儀衛奉天書先道悉陳所獻芝草嘉禾瑞木於仗內辛丑駐蹕鄆州丁未入乾符縣幸奉高宮庚戌臨山門辛亥享昊天上帝於圓臺陳天書於左以太祖太宗配帝袞覲奠獻攝中書令王旦跪稱天賜皇帝太一神策周而復始永綏兆人羣臣享五方帝諸神於山下傳呼萬歲振動山谷壬子禪社首如封祀儀縱四方所獻珍禽奇獸改奉高爲會真宮癸丑御朝觀壇受羣臣朝賀大赦天下令開封府及所過州軍考送服勤詞學明經行脩舉人其懷材抱器淪於下位及高年不仕德行可稱者所在以聞三班使臣經五年者與考課錢氏陳氏孟氏馬氏高氏劉氏近親子孫未食祿者悉聽叙用以呂良攝兗州助教賜天下酺

三日改乾封爲奉符縣泰山七里內禁樵採大宴近臣于穆清殿泰山父老於殿門賜以時服茶帛甲寅發奉符始復常膳丙辰次兗州升爲大都督府十一月戊午幸曲阜謁文宣廟釋袍再拜賜經史幸叔梁紇堂近臣分奠七十二弟子封顏回以下爲國公左丘明而下爲郡公侯伯皆從祀廟庭遂幸孔林加饗孔子曰元聖文宣王遣官祭以太牢給十戶奉塋廟賜其家錢帛擢聖佑奉禮郎近屬授官賜出身者六人追諡齊太公昭烈武成王令青州立廟周文公曰文憲王曲阜縣立廟辛未幸河濱廟加封丁丑駕至京壬午奉天誓還宮立正月三日爲天慶節甲申命王旦奉冊上太祖太宗尊諡親享太廟乙酉大宴含光殿十二月辛卯御乾元殿受尊號曰崇文廣武儀天尊道寶應章感聖明仁孝皇帝辛丑加王旦張齊賢王欽若王化基邢

曷郭贊溫仲舒寇準等官苑王元佑而下並進勲爵德雍而下  
並領諸州刺史允升而下各衛將軍黎至忠同平章事契丹使  
上將軍蕭智可及西涼府甘州三佛齊大食國西南蕃等皆來  
賀封禪詣路言歲稔米斗七八錢二年春正月癸亥封禪慶  
成賜宗室輔臣襲衣金帶器幣乙丑並內殿承制改定入內  
侍職名庚午詔轉運司嚴誡凡請非聖旨及屬辭浮靡者鏤板  
文集擇官看詳可者錄奏三月丙辰日當食陰晦不見五月代  
州地震庚辰陝西旱遣使巡撫并禱太平宮后土西嶽河嶺諸  
祠六月庚戌御試東封路服勤詞學經明行脩梁固等九十二  
人詔從時議國家受瑞建封非遇災異罷停制舉六科秋七月  
丁巳置糾察在京刑獄司加昭應宮以玉清二字兗州霖雨害  
稼命賑恤及蠲京東徐鳳濟七州水災田租并封禪赦前天下

逋負千二百六十六萬緡九月戊午命工部侍郎馮起爲契丹  
國信使甲午詔天下置天慶觀十一月丙辰作文武七條戒官  
吏三年閏二月銅候儀成三月癸巳文州大校李公蘊逐殺  
節度使黎至忠自稱留後遣使貢奉帝用故事以蠻俗爲不足  
責授節封王如故并賜衣帶器幣夏四月皇子生宮人李氏所  
出辛丑京師大雨平地數尺六月庚戌契丹饑來市羅詔雄州  
賑粟二萬石河中府進士薛南及父老千二百人并河南尹寧  
王元僊率文武官將校等三上表請祠汾陰后土秋八月丁未  
朔詔明年春有事于汾陰脩治行宮道路禁戢如東封之制遣  
官告天地廟社嶽鎮海濱配以太祖太宗一如封禪儀詣雁上  
築壇八角三成瘞坎皆如社首制正坐玉冊玉匱一副配坐玉  
冊金匱二副先於祭前七日遣使祭河中府境內伏羲神農帝

舜成湯周文武漢文帝周公廟及於厓下祭漢唐六帝時因歲  
旱學士孫奭上疏陳其不可者十帝嘉其忠而不能從九月丁  
亥作宗室座右銘賜諸王華州父老二千餘人請幸西嶽甲辰  
昇洪楊廬州長吏兼安撫使內出綏撫十六條頒之冬十月河  
中民獲靈寶真文十一月己亥陝州黃河再清丁巳詔崇安院  
集官詳校道藏經李宗諤等上諸道圖經己巳作奉天庇民述  
示宰相 四年春正月乙酉帝習儀于崇德殿丙申詔以六月  
六日天書再降爲天貺節丁酉發京師二月戊申賜扈駕諸軍  
緡錢華州獻芝草東京奏獄空癸丑次河中府丙辰至寶鼎縣  
幸奉祇宮戊午致齋己未漢泉湧有光如燭辛酉加上承天效  
法厚德光大后土皇地祇祝文大意如前祭畢帝改服通天冠  
絳紗袍乘輦謁后土廟設登歌奠獻遣官分奠抵奉祇官樂作

改爲太寧宮御朝覲壇受朝大赦天下文武官並遷秩叙封建  
寶鼎縣爲慶成軍賜天下大酺三日宴羣臣於穆清殿賜父老  
酒食衣幣作汾陰配饗銘河濱四海賚加西嶽號丁卯賜寧王  
元僮服帶鞍馬擢薛南將作監主簿乙巳次華州幸雲臺觀庚  
午宴宣澤亭召見隱士鄭隱李寧賜茶果束帛三月巳卯次西  
京壬午幸上清宮甲申幸呂蒙正第賜服御金幣丙戌宴大明  
殿御五鳳樓觀酺壬辰將發朝陵詔不舉樂丙申謁畢夏四月  
甲辰朔至京丙辰宴含光殿五月癸巳詔州城置孔子廟乙未  
加上五嶽帝號作奉神述以敘中等爲奉冊使六月丙午亳州  
二龍見禹祠丙寅遣使安撫江淮水災許便宜從事秋七月壬  
申朔除閩浙荆湖廣南歲丁錢四十五萬鎮扈昌等州地震八  
月乙巳太白晝見冬十一月丙子御試服勅詞學經明行脩舉

人 五年春正月戊寅雨水冰壬午河決棧州詔官吏安撫被  
水農民免民物入城市者稅三月己丑御試禮部舉人庚戌加  
王旦等並特進功臣秋八月丙申朔日食己未作五嶽觀冬十  
月戊午帝親見九天司命天尊降延恩殿道場遂上聖祖聖母  
尊號立先天降聖二節詔建安軍鑄聖像建景靈宮太極觀于  
薛丘以奉之己未大赦天下賜致仕官全俸辛酉作崇儒術論  
刻石國學閏月乙亥加太廟六室尊諡丙子羣臣上尊號曰崇  
文廣武感天尊道應真佑德上聖欽明仁孝皇帝辛巳龍見雲  
中戊子御製配享樂章并二舞名文曰發祥流慶武曰降真觀  
德十一月丙申親祀玉皇於朝元殿甲辰加恩中外丁未作汴  
水發願文十二月甲子置景福殿使以承莊領之壬申改諡孔  
子至聖文宣王己卯知天雄軍寇準奏獄空詔獎之丁亥立德



妃劉氏爲皇后帝深重之由是漸干外政 六年春正月癸巳朔上御朝元殿受朝司天監奏五星同色戊申禁內臣出使干預民政違者從重論州縣容受不奏與同罪己酉賜京師酺五日辛酉詔宗正寺置玉牒所脩帝籍爲皇朝新譜名曰仙源積慶圖三月乙卯建安軍鑄玉皇太祖太宗聖像成升爲真州上親謁奉安於玉清宮夏四月壬午太白晝見六月壬戌趙州黑龍見丁卯壽丘獻紫莖金芝丙子詔學士陳彭年等刪定三司編敕秋七月己亥元德皇后配祔行禮癸卯詔天下勿稅農器已酉亳州官吏父老道釋舉人三千三百人詣闕請謁太清宮八月庚申宰臣帥百官表請詔以來春親行朝謁禮丙寅禁太清宮五里內樵採庚午加號太上老君混元上德皇帝封藏寶冊用玉匱一副制如前禮同天神用蒼璧奠獻孫奭諫不聽帝

作解疑諭以示羣臣九月壬午降聖節賜會如先天節儀冬十二月戊午朔日食 七年春正月壬寅車駕發京師丙午次奉元宮齋于迎禧殿丁謂獻白鹿一芝草九萬五千本己酉帝服袞冕行朝謁之禮相王元偓亞獻榮王元儼終獻分命輔臣薦獻諸殿改奉元爲明道宮真源爲衛真縣升亳州爲集慶軍節度減歲賦十之二太史奏含譽星見庚戌御均慶樓賜酺三日壬子詔車駕所經除流以下罪所過頓逋侵民田者給復二年丙辰建應天府爲南京作鴻慶宮歸德殿以奉太祖太宗聖像追贈祖宗幕府元勛僚舊錄常叅官逮事者並進秩欲授子孫者聽二月戊午次襄邑縣皇子來朝辛酉至京辛未饗太廟壬申恭謝天地大赦天下三月乙未宴翔鸞閣夏四月癸亥河南府奏獄空有鳩巢其戶生二雛秋七月癸卯太白晝見八月甲

戊河決涇州九月戊戌御試亳州南宮路服勤詞學經明行脩舉人張觀等二十一人冬十一月玉清昭應宮成總計二千六百一十區詔減諸路繫囚罪流以下一等壬辰御乾元門觀酺十二月癸丑朔日當食不虧己未作元符觀高麗爲契丹所阻不通者累年是歲始通遣使來貢戶部獻天下民數戶九百五萬五千七百二十九口二千一百九十七萬六千九百六十五

八年春正月壬午朔謁玉清昭應宮奉表尊上玉皇聖號曰太上開天執符御曆含真體道玉皇大帝奉安刻玉天書于寶符閣還御崇德殿受賀大赦天下二月丙子詔進士六舉諸科九舉者並許奏名庚辰大雨淮浙饑遣使巡撫三月壬寅賜進士蔡齊等二百八十人夏四月辛酉名宰相閣御製皇正帝霸五臣等論以良臣正臣忠臣奸臣權臣五論賜宰相癸酉朝

元殿災詔求直言庚寅熒惑犯軒轅壬辰廢內侍省黃門禁金飾服噐庚子放宮人一百八十四六月己酉朔日食辛未詔諸州以御製七條刻石閏月己卯赦天下冬十二月戊寅皇子加冠是歲賜信州道士張正隨號真靜先生 九年春二月詔立資善堂命皇子就學以張士遜崔遵度爲王友丁亥王旦等上兩朝國史加守司徒以下進秩賜物有差夏四月庚辰周伯星見賜天下酺五月庚午太白晝見六月戊寅宮觀慶成幸會靈觀宴視禱殿秋七月旱蝗丁未詔罷秋宴停增築京師新城工及諸營造禁舉樂并天下貢瑞物督諸路捕蝗八月丙子令江淮發運司留上供米五十萬以備饑年九月癸卯雄霸河溢甲寅雨青州言蝗赴海死已巳詔民出廩賑乏三千石至八千石第授助教文學上佐之秩十一月會靈觀甘露降是歲撫水獺

寇宜州廣南西路以便宜掩擊走之

天禧元年春正月辛丑朔改元詣玉清昭應宮薦獻上玉皇及聖祖寶冊袞服尋出聖祖金牌給京城寺觀天下名山命旦於兗州太極觀奉上册寶大赦御天安殿受冊號命宰相讀天書作欽承寶訓述示羣臣王欽若獻天禧大禮記四十卷二月壬申御正陽門觀酺丁丑置諫官御史各六員每月一員奏事有急務聽非時入對辛巳考課改京朝官秩壬午定宗室子授官之制三月辛丑不雨諸路蝗罷上巳宴禘于四海詔所在發廩安恤流民夏四月朔旦立天祚節冬十月辛未詔閤門自今審官三班院流內銓後殿日引公事勿過兩司十二月大雪給貧民粥并瘞死者帝慮失播種命宰相下詔賑勸毋遺地利二年春正月壬寅賑京東西河北鎮戎軍饑二月丁卯詔近臣舉

堪任御史者從右正言劉曄請自今言事並許升殿三月辛丑  
修京城閏四月甲寅皇城司言保聖營西南新建真武祠側有  
靈泉湧出京師飲者愈疾詔卽其地建祥源觀劉曄任布皆諫  
不聽五月丙戌西京訛言有妖如帽夜蜚傳至京城民甚恐呼  
噪達曙詔捕嘗爲邪法人耿縻等棄市六月辛亥彗出北斗魁  
丁亥始沒秋八月皇人子立是歲辰州討下溪蠻斬首六千餘  
級降千餘人詔釋彭儒猛罪陝西旱賑之三年春二月乙未  
河南府地震三月戊午朔日食丙寅賜進士王整等一百四十  
人判永興軍寇準言天書降乾佑山夏四月迎入禁中魯宗道  
孫奭知爲朱能所造諫不聽自是名準復相位以能爲左龍武  
軍大將軍八月辛卯太白晝見冬十一月己巳謁景靈宮庚午  
饗太廟辛未祀圜丘大赦丁丑御天安殿受尊號冊曰體元御

極感天尊道應真寶通文德武功上聖欽明仁孝皇帝百官加  
恩是歲河決滑州泛澶州齊徐境遣使撫卹京東西河北水  
災江浙及利州路饑詔振之慶州熟戶委乞骨洋大門等族歸  
附 四年春正月乙丑曹瑋簽書樞密院事簽書兼領  
諸鎮始此二月帝  
有風疾不視朝大政皆決中宮倚用夏守恩劉美與丁謂交通  
詭秘其黨曰固帝嘗臥枕東宮官周懷政股與之謀欲命皇太  
子監國懷政出告寇準中外無知者上以疾不記前言錢惟演  
因謀罷準擢謂與曹利用並同平章事馮拯爲樞密使夏四月  
有兩月並見西南丁亥大風晝晦壬寅御試禮部奏名舉人九  
十三人秋七月丁巳太白晝見八月朱能叛九月丙辰帝疾瘳  
始御崇德殿視事治朱能黨死流者數十人丁卯赦天下己巳  
遣使安撫永興軍壬申賜京師酺冬十月戊寅命依唐制雙日

不視事壬午幸正陽門觀酺帝自不豫臨幸寢少至是人情大  
悅丙午召皇子宗室近臣王宸殿觀稻賜宴帝聽覽之暇游心  
翰墨以文史自娛十一月戊午召近臣於龍圖閣出御製文詞  
凡七百二十二卷宰相謂等請鏤板宣布建天章閣以貯之辛  
未詔自今羣臣五日於長春殿起居餘隻日視朝於承明殿十  
二月乙亥帝力疾御承明殿賜手書宰相論以輔導儲貳之意  
是歲江浙淮南唐鄧益梓利秦隴淄州皆饑遣使安撫賑貸京  
城穀貴減直發常平倉京西陝西江淮荆湖諸州稔滑州河塞  
復決响斷囉爲邊患詔陳堯叟等巡撫 五年春正月上體少  
康赦已亥宴近臣承明殿二月丙寅賜天下酺庚午以孔聖祐  
襲封文宣公三月辛巳御正陽門觀酺辛丑京東西水災遣使  
安撫賜民租十之五夏四月丙辰客星出軒轅六月丙午太白



盡見秋七月甲戌朔日食八月壬戌熒惑犯南斗冬十月壬子  
詔五日受朝遇慶會命皇太子押班是歲京東河北兩川荆湖  
皆稔所廩糶請降

乾興元年春正月辛未朔改元大赦天下庚戌詔賑糴湖秀徐  
等州貧民甲寅帝病增劇對宰相于寢殿令禱于山川神祇二  
月戊午大漸遣詔皇太子於柩前卽皇帝位尊皇后爲皇太后  
權處分軍國事楊淑妃爲皇太妃是日帝崩于延慶殿年五十  
五在位二十六年葬永定陵以天書從上尊諡曰文明武定章  
聖元孝皇帝廟號真宗慶曆七年加諡體符稽古神功讓德文  
明武定章聖元孝皇帝 新安胡氏嘗反覆論帝之始末謂景  
德以前足爲繼世之賢君祥符以後不過爲矯誣上天之主呂  
氏又云景德以前之相呂端張齊賢李沆呂蒙正畢士安寇準

王旦皆君子而沆之賢爲最祥符以後之相王欽若陳堯叟馮拯丁謂曹利用皆小人而欽若之奸邪爲最雖有向敏中李迪二賢已不踰時而去矣吁以數君子成之不見其有餘以一小人敗之不見其不足相道有關於君德之成敗如此夫

冊曰父祖重熙子臣累洽帝處其間不苛不虐雖無甚美亦無甚惡觀過知仁此其大畧